



Unbeschryblig wyblig

Was isch dr Stolz vo vyle Fraue?
Was dien d'Männer haimlig so gärn bschaue?
Was macht so unbeschryblig wyblig d'Frau?
Was macht dr ganz spezielli Raiz uus au?
E mänge luegt mit Gluscht und Luscht
uf e scheeni Frauebruscht.

D'Gschicht zaigt, dass d'Fraue friehner als,
sich ebbe verhillt hän bis zem Hals.
Me het d'Figuur ebitz betont,
's Drage vom Korsett het sich glohnt.
Doch isch d'Frau ganz scheen yzwängt,
fiehlt sich dur das enorm ygschrängt.
Es hätt au kenne glatt bassiere,
dass sich d'Fraue schier kaschtriere,
denn 's Korsett schloot, das ka me saage,
de Fraue bildlig uf e Maage.

D'Mary Phelps, mit 19 Jahr,
het denn gseh die groossi Gföhr,
wo das halt au mit sich bringt,
wenn me sich ins Korsett zwingt.
Si het sich gsait: „So goht das nimme,
my Lääbesqualiteet muess stimme!“
Si sait sich: „'s Korsett isch passe,
ych draag ab hitt kai Korsett meh.“
Vor em Debütanteball in USA,
macht si sich mit Yfer dra
und baschtlet so ganz kurzerhand
us Sydediecher und eme Band
e Schutz, wo d'Bruscht verdegge duet,
y glaub das bruucht scho zimmlig Muet.
So ka si befreyt zem Danze goh.
Denn het si 's patentiere loh.
So isch's denn – han y vernoo –
zem erschte Büstehalter ko.
Verdient drmit het si nit vyl,
drum isch denn au ihr wyters Zyl
's Patänt z'verkaufe, meeglischt gly,
an d'Warner Brothers Company.
Die hän denn im groosse Styl
BHs vermarktet, mit em Zyl,
d'Fraue vom Korsett z'befreye
und so kunnt's denn zem e neye
Bild von dr befreyte Frau.
E guets Gschäft isch 's nadyrlig au.
D'Warner Brothers Corsett Company
nimmt in 30 Jahr scheen Dollars y.
15 Millioone syge 's – heert me saage –
die hän drum kai Grund zem klaage.
Doch gspässig – 's sinn nit alli froh,
so isch es zem en Ufstand ko.
E Frauegrubbe z'USA
het kai Fraid am BH gha,
1968 wättere si gege dr BH denne,
Lehn gar das Gleadigsstigg verbrenne.

Au d'Greessi vo däm guete Stigg
wandlet sich im Modeblig.
Emool ka d'Bruscht nit grooss gnueg sy
und denn schniert me si wider y.

Me sait es haig au andri gha,
die haige ihre Aadail dra,
dass d'Fraue hitte d'Bruscht bedegge
mit em BH – nimm im Korsett stegge.
's goht uf und ab mit däm BH,
's het immer Modeschepfer gha,
wo gsait hän, wie das Stigg soll sy
und d'Modefrau, die schiggt sich dry.
Wenn dr St. Laurent bestimmt,
was dr BH fir e Form aanimt,
wird 's vo de Fraue glaaglos gschluggt,
au wenn 's als e bitzli druggt.
Simmer ehrlig, 's isch doch so,
dr BH het e Wärt bikoo
wo d'Modebranche glaar bestimmt,
em BH au 's Versteggspiil nimmt.
Er darf sexy sy oder verspiilt,
dass d'Männerwält au gärn druf schiilt.
Dr Wonderbra kunnt uf e Märt
und gwinnt immer meh an Wärt,
doch wie jeede Modefurz,
isch dä Trend relativ kurz.

Y glaub doch, dass mr unsre Fraue
modisch kenne ganz vertraue.
Si kaufe sich, was si gärn draage,
drum wär zem Schluss numme no z'saage:
D'Mode digtiert's, doch 's blybt derby,
's soll unbeschryblig wyblig sy.



**Hättsch dr Plausch mit uns Fasnacht z'mache? Mir sin e glatti
Gsellschaft und hän 's guet zämme. Bisch e Pfyffer, Drummler
oder Vorträbler, wo sich verändere wott, so froog doch emool
bi uns aa! Mir nämmes nimme so sträng und wänn aifach Fraid
an dr Fasnacht ha. Aamälde kasch Di bi de Kontagtpersone:
Spezi Alti Garde, Alice Stöcklin, Birsigstrooss 9, 4103 Bottmige,
Del. 061 421 14 22, E-mail: stoecklin@intergga.ch (Fraue und
Männer), AGB Alti Garde, Jörg Nussbaum, Frobenstrooss 27,
4053 Basel, Del. 079 485 69 91, E-mail: info@rr-kreativ.ch
(numme Männer).**

**D'Ladäärne-Uusstellig uf em Minschterblatz und d'Waage- und
Requisyte-Uusstellig bi dr Kasärne sin allewyl no vom Mäntig
znacht bis am Mittwoch demorge! Dert und au an de drei Ver-
kaufsständ (CINS) in dr Stadt ka men alli Zeedel und Schnitzel-
bängg, d'Blaggede und dr Rädäbäng kaufe.**